

Nova godina, nova perspektiva



Nova godina je imala povoljan i pozitivan početak jer je nakon pregovora, koji su trajali mjesecima, postignut dogovor o formiranju vlasti, istakao je visoki predstavnik i specijalni predstavnik EU u svojoj sedmičnoj kolumni koju objavljuju dnevni listovi u BiH.

“Bosna i Hercegovina bi uskoro trebala imati novu vladu, a značajno je i da se sedam političkih stranaka, koje su se dogovorile o formiranju vlasti, takođe usaglasilo oko sveobuhvatnog programa za daljnji napredak ove zemlje», kaže gospodin Schwarz-Schilling u svojoj kolumni objavljenoj u »Večernjem listu», «Nezavisnim novinama» i «Dnevnom avazu».

Visoki predstavnik i specijalni predstavnik EU je istakao da je ohrabren činjenicom da su dogovor postigle same stranke uz minimalnu intervenciju međunarodne zajednice. «To je u skladu s filozofijom koju sam predstavio prilikom preuzimanja funkcije visokog predstavnika i specijalnog predstavnika EU, prije nešto manje od godinu dana, odnosno kada sam istakao da neću intervenirati tokom aktivnosti na pronalaženju rješenja u slučajevima kada su rješenja sasvim jasno u okviru nadležnosti izabranih bh. lidera», kaže visoki predstavnik i specijalni predstavnik EU u svojoj kolumni.

Visoki predstavnik je pohvalio način na koji je Predsjedništvo BiH, kao institucija koja ima ustavnu nadležnost za nominiranje predsjedavajućeg Vijeća ministara BiH, pomoglo u postizanju dogovora. «Sposobnost da se formira vlast u okviru razumnog vremenskog roka ima odlučujući značaj i za princip odgovornosti, što je zadatak koji je potrebno ispuniti za odvijanje tranzicije u Bosni i Hercegovini u skladu s planiranim rokovima», ističe visoki predstavnik i specijalni predstavnik EU u svojoj kolumni.

Visoki predstavnik je takođe pohvalio lidere političkih stranaka koji su pokazali spremnost da postignu potrebne kompromise i da jedni drugima izađu u susret kako bi postigli saglasnost o zajedničkom programu. «To predstavlja pravi pragmatični pristup koji političari moraju pokazati kako bi preuzeli odgovornosti za budućnost Bosne i Hercegovine, kao i za efikasno vođenje ove zemlje» kaže se u kolumni.

Međutim, visoki predstavnik i specijalni predstavnik EU ističe da novi organi vlasti još uvijek nisu formirani i da je potrebno još dosta toga učiniti kako bi se osiguralo postojanje efikasnih organa vlasti u Bosni i Hercegovini. «Da bi Parlament mogao usvajati zakone potrebno je da bude formiran i Dom naroda, što još uvijek nije učinjeno, a formiranje ove institucije zavisi od formiranja organa vlasti na kantonalnom nivou i nivou Federacije BiH», kaže se u kolumni.

Gospodin Schwarz-Schilling je podvukao da se samim programom kao vrhunski prioritet definira evropska integracija Bosne i Hercegovine, s naglaskom na ispunjenju raznih uslova za potpisivanje Sporazuma o stabilizaciji i pridruživanju sa Evropskom unijom, uključujući i reformu policije. «Da bi se ispunili uslovi za potpisivanje Sporazuma o stabilizaciji i pridruživanju i pomoglo da Bosna i Hercegovina postane zemlja-kandidat za članstvo u EU, politički lideri će morati i dalje demonstrirati pragmatizam i sposobnost za kompromis koje su pokazali u postizanju sporazuma u srijedu» kaže visoki predstavnik i specijalni predstavnik EU u svojoj kolumni.

Gospodin Schwarz-Schilling je takođe istakao da utvrđivanje programa o kojem se mogu usaglasiti svi koalicioni partneri predstavlja samo prvi korak prema stvaranju efikasne vlade. «Vlada će se testirati na načinu utvrđivanja politike za pružanje podrške ovom programu i rješavanju ključnih pitanja, kao što je ustavna reforma, o kojima se stavovi trenutno razilaze», piše visoki predstavnik i specijalni predstavnik EU u svojoj kolumni.

“Od ključnog je značaja da se nova vlada formira što prije i da se Parlament usredsredi na reforme i pozabavi mnogim neriješenim pitanjima, što može doprinijeti i evropskoj integraciji Bosne i Hercegovine i unapređenju životnih uslova i izgleda za bolji život svih njenih građana”, zaključuje gospodin Schwarz-Schilling.

Cijeli tekst sedmične kolumne visokog predstavnika i specijalnog predstavnika EU dostupan je na web stranicama: www.ohr.int i www.eusrbih.org.